

RESOLUCIÓN REITORAL DO 6 DE FEBREIRO DE 2023 POLA QUE SE DITAN NORMAS RELATIVAS AO RECOÑECIMENTO DE TRIENIOS DE ANTIGÜIDADE AO PERSOAL DE INVESTIGACIÓN DA UNIVERSIDADE DE VIGO.

O proceso de negociación iniciado na mesa de negociación do PDI da Universidade de Vigo en marzo de 2021 en relación aos complementos retributivos do persoal de investigación culminou co acordo de 26 de novembro de 2021 no que se recolleu, entre outros, o recoñecemento de antigüidade (trienios) ao persoal de investigación.

Este acordo, cuxos efectos económicos establecidos inicialmente para o 1 de xullo de 2022 quedaron condicionados á existencia de dispoñibilidade orzamentaria, foi ratificado posteriormente en acordo de Consello de Goberno de 11 de marzo de 2022, así como na mesa de negociación do PDI celebrada o 20 de setembro de 2022, acordándose recoñecer a antigüidade dun trienio con efectos económicos de 1 de xullo de 2022. A contía correspondente ao resto dos trienios, conforme ao acordado no proceso de negociación, terá efectos do 1 de xaneiro de 2023.

Unha vez comprobada a existencia de dispoñibilidade de crédito e identificada a partida orzamentaria desde a que se fará fronte aos custos derivados do recoñecemento dos dereitos que se recollen nos devanditos acordos, esta reitoría,

DISPÓN:

Primeira: Obxecto

A presente instrución ten por obxecto recoñecer a antigüidade aos efectos de cumprimento dos trienios na Universidade de Vigo e os conseguintes efectos económicos ao persoal de investigación contratado consonte as



previsións da Lei 6/2001, do 21 de decembro, Orgánica de Universidades, Lei 14/2011 do 1 de xuño, da Ciencia e Tecnoloxía e a Innovación, e a normativa de contratación de persoal investigador da Universidade de Vigo, aprobada por Acordo do Consello de Goberno de xuño de 2022, modificada en xullo e outubro de 2022, que actualmente non ten dereito á percepción de remuneración da antigüidade, en cumprimento do acordo acadado na Mesa de Negociación do PDI, do 26 de novembro de 2021, ratificada por Acordo do Consello de Goberno de 11 de marzo de 2022 e Acordo da Mesa de Negociación do PDI do 20 de setembro de 2022.

Segunda: Ámbito de aplicación

Recoñecerase a antigüidade aos efectos de cumprimento dos trienios por servizos prestados na Universidade de Vigo ao persoal vinculado mediante contrato laboral de persoal de investigación.

Terceira: Procedemento

Aos efectos do recoñecemento dos trienios, a Universidade de Vigo procederá de oficio a valorar a antigüidade polos servizos prestados na dita institución, sen que sexa preciso presentar petición expresa por parte do personal interesado no intre da súa perfección.

Cuarta: Cómputo dos servizos prestados

Aos efectos do cómputo dos servizos prestados recoñeceranse de oficio os períodos de servizos prestados na Universidade de Vigo que se acumularán por orde cronolóxica. Un mesmo período non pode computar mais dunha vez.

Os períodos de tempo non computados para o recoñecemento dun trienio serán tidos en conta para a súa acumulación ao/s seguinte/s período/s en que preste servizos o/a profesional, de ser o caso.



Quinta: Efectos

O persoal percibirá en concepto de antigüidade por cada tres anos de servizos prestados unha cantidade anual igual á que corresponde aos funcionarios do subgrupo A1.

O trienio recoñecido terá efectos económicos no mes seguinte ao do seu cumprimento e o seu devengo se corresponderá co réxime de prestación de servizos do profesional.

Disposición transitoria primeira: O persoal vinculado coa Universidade de Vigo mediante contrato de persoal de investigación terá dereito ao recoñecemento do primeiro trienio con efectos económicos e administrativos do 1 de xullo de 2022, sempre que cumpra os seguintes requisitos:

- a) Ter contrato laboral de persoal de investigación na data do 1 de xullo de 2022
- b) Ter acreditados tres anos de servizos prestados na Universidade de Vigo a 1 de xullo de 2022

A Universidade de Vigo recoñeceralle de oficio ao dito persoal os ditos servizos prestados a efectos do cumprimento do trienio.

O persoal percibirá unha contía equivalente ao valor do trienio, consonte a cláusula quinta da presente instrución, polo período do 1 de xullo de 2022 a 31 de decembro de 2022, que se abonará nun único pago.

Disposición transitoria segunda: Ao persoal que na data do 1 de xullo non tivese vinculación coa Universidade de Vigo ou non reunise os requisitos para o recoñecemento do trienio, pero puidese estar en condicións de reuniilos en data posterior, seranlle recoñecidos consonte o procedemento da disposición transitoria primeira con efectos da data de cumprimento, e devengará os dereitos económicos relativos a anualidade de 2022 dende a dita data.



Disposición transitoria terceira: O recoñecemento da antigüidade por servizos prestados para o cumprimento dos sucesivos trienios terá efectividade a partir do 1 de xaneiro de 2023.

Disposición derradeira: Habilítase á Xerencia para adoptar os actos e medidas necesarias para a execución desta resolución

A presente resolución entrará en vigor na data da súa publicación.

Vigo, 6 de febreiro de 2023

O reitor

Manuel Joaquín Reigosa Roger

